

**Copij van den brief van Z. Exc. aan Magistraat en Leden
van Antwerpen.**

Edele, erentfeste, eersame, hoochgeleerde, besundere
goede vrinden, ons is by uwe gedeputeerde (volgende de
brieven van credentie ten selven eynde ons geleverd)
aengedien tende gheopent tgene opten lesten Breeden
Raedt den 19den deser maent soo nopende het consent

by u luyden ghedraghen tot bevredinghe van de ghealtereerde soldaten binnen der stadt van Vilvoorden liggende, als beruerende tfeyt van den colonellen es ghehandelt ende by den leden van uwe stadt bestemmet ende overgedragen geweest, voor soovele es raeckende den eersten poincte, is ons een sake tot grooten bevalle ende seer aengenaem geweest te verstaen het liberael ende mildich consent in desen deelee by u gedragen voor soovele wy daer vuyt merckelyck connen bespueren den goeden iver ende gheneghentheyte die ghylieden syt draghende tot die ghemene saecke, ende het generael welvaren, denselven oversulckx daer aff bedanckende, welcken aengaende wy niet en connen laten u luyden voortste bidden uwe goetd devoir ende resolutie hiertoe te willen laten strecken dat op de gemeyne contributien ende penninghen totte jeghenwoordighe oorloghe van noode synde, eene eenparighe ende gelyckformige voet genomen ende gehouden mach worden, volghende de resolutie int affscheiden van de leste vergaderinghe tot Delft genomen, ten eynde onder den provincien eene goede eenicheyt ende correspondentie ghehouden mach worden ende alle scheidighen ende oneenicheden verhuedt, maer soo wy tgene vs. is seer gherne hebben verstaen, soo is ons oock sunderlinghe swaer gheweest te aenhooren het tweede poinct aenclevende de colonellen ende de conditie van veranderinghe daer mede het vs. consent is gebonden gheweest, ende es tselve (om vryelyck ende opentlyck met u luyden te spreken) niet sonder onsen grooten leetwesen verstaen gheweest sulckx dat wy niet en connen naerlaten (de saecke bewegende ende bemerckende soo sy in haer selven is ghelegen) te verclaren dat ons in langhen tyt niet en is voorgevallen dwelck ons soo onbehaechelck is gheweest, niet ten aensien van de affsettinghe der vs. colonellen (welcken aengaende wy wel achten behooryck te wesen dat de lasten ende ambten onder de gemeynte worden verdeilt endeten bequamen tyde verandert, noch oock ten bemerckenvan onse autoriteyt die in desen ten achter gestelt ende voorby gegaen soude mogen wesen (hoewel nochtans:

eenigelyck eenich kennisse hebbende int feyt van gou-
vernemente wel can bespuenen deselve in alle goede re-
gieringhe nootelyck te syne) soo te vergeefs iet goedts
ende tot voordeel van de gemeynte werdt geordonneert,
wanneer sulckx niet achtenvolgt en werdt, want wy stel-
len te bedencken van u luyden (die ghetuygenisse syt
van onsen vorighen handel in ale voorcomende saecke
binnen uwe stadt) dat wy desaengaende niet en hebben
willen resolveren oft besluyten dan met voorgaende com-
municatie ende onderlinghe beradinghe met ulieden,
maer hebben wy gheacht sulckx niet voor goet te connen
houden oft aennemem ten bemercke van de quade con-
sequentie, groot nadeel ende periculeux innesien, stre-
ckende tot clare ende merckelycke verhinghe van
de ghemeyne saecke) die alsulcke maniere van doene
met huer is medebrenghende, alsoo men deur sulcken
middel met eene saecke van cleyder ghewichte ende
importancien het gemeyn ende generael welvaren terug-
ge stelt ende geheelyck soude moghen verachtenen, te
meer dat de vs. veranderinghe binnen korten daghen
daer naer gevuegelyck hadde mueghen gheschieden; ende
wy oock sulckx by onse leste brieven hadden gelooft,
gelyck wy al tselve hebben breedt ende int lange claer-
lyck bewesen u luyder vs. ghecommitteerden totte wel-
cke wy ons syn refererende, niettemin gemerckt de vs.
resolutie van de vier nieuwe colonellen ende verlatinge
van de vier oude sulckx is genomen ten eynde wy van
deen inconvenient in dandere niet en vallen, hebben wy
deselve wel willen approberen ende goetvinden soo wy
denselven keuse die ons by denselven ghecommittēerden
is geleverd, oick approberen ende goetvinden midts de-
sen versueckende oock den voorgaenden hen te willen
doen alle hulpe ende bystandicheyt int bediēnen van dien
soo wy tselve hun syn betrouwende, middelertyt willen
wy niet laten u luyden te bidden ten aensiene van u
luder eyghen profyt ende oirboirheyt in toecomenden
tyde van gelycke periculeuse nieuwicheden u te wachten
ende vermyden ende veel meer voor ooghen te hebbene
ende nemen de ghemeyne welvaert ende conservatie van

den lande dan eenighe particuliere saecken die het ghemeyn best niet en syn vorderende ende waer vuyt meer swaricheyts, peryckels ende quade consequentie dan nuts is volghende. Ende ons aengaende hebben wy u luyden wel willen verclanen dat wy in gheen saecke ons eyghen ofte particulier oyt ghesocht en hebben oft alnoch en soecken dan alleenlyck het ghemeyne welvaren ende u luyder ende der landen nut ende voorspoet ende daarom hebben wy dickwils versocht zoo u lieden genoegh is bekend van onse ampten ende lasten ontslaghen te wesen dwelck wy des te meer souden begheinen, siende dat die sake sonder ordre in ongeregeltheyt ende confusien greehandelt ende voorgenomen worden, anderssins waer wy u lieden ende uwe stadt ende de ghemeyne sake vorde-ringhe ende dienst sullen connen doen, sullen ons daertoe altyt bereedt bethoonen ende gelyck wy altyt gedaen hebben niet sparende van de middelen die ons Godt verleent heeft. Hier mede, edele, erntfeste, eersame, hoochgeleerde besunder goede vrinden, zyt Gode bevo-len.

Vuyt Amsterdam, den 28sten martii 1581.

Onder stondt gheschreven de prince van Oraengien, grave van Nassau etc., luytenant generael etc.. Daer onder stondt oock aldus gheschreven U. L. zeer goede vrindt tot uwen dienste. Onderteeckent Guille de Nassau.